



QUÆSTIO MEDICA,

*Cardinalitiis disputationibus manè discutienda in Scholis
Medicorum, die Jovis tertiâ Martii 1712.*

M. JOANNE DAVAL, Doctore
Medico, Præfide.



An senibus Thè?

I.

HUMANUM corpus quàm sibi pro variis ætatibus dissimile! id cum à liquidis, tum à solidis, quibus constat, partibus. Liquidæ sunt sanguis, & quarundam ejus partium rivuli; utrique diversæ indolis particulis pollent; ille omnigenis, hi certis quibusdam, à diversis peculiaribusque particularum mole & figurâ effervescentiæ, fermentationes: quibus omnis latex perficitur, perimitur. Ne mireris! quotidie contrarii effectus ex eadem causâ prodeunt. Quæ per initia evolvit, gignit; ipsa dein disrumpit, disperdit. Solidæ partes molem corporis Naturâ suâ quiescentem complectuntur. Hæc mirabilis est divinaque compages tubulorum, quorum alii recti; alii curvi; plerique in multiformes vesículas expansi; omnes ex eadem ficti materiâ, & vario præditi diametro pro variis externarum internarumque rerum actionibus mutabili. Singuli isti ductus motum mutantur à liquidis: passivè dumtaxat ad varias motus determinationes conferunt; ex se licet immoti, multas tamen subeunt mutationes, jugiter insensiles, certis temporibus conspicuas: quibus liquores multò magis obnoxii. Solidæ ejusmodi partes in pueritiâ exiles, teneræ, molles: liquidæ verò implicitæ, rudes, nondum defecatæ. Utræque in juventute vegetiores: in ætate, consistente vulgò dictâ, aliquatenus infirmatæ: in senectute (proveciore præsertim) effectæ prorsus & imbelles; in hac enim liquores acescunt; ferè vertuntur in facem; lentius moventur; pluribus in locis desident; quadam tenus arescunt vasa, laxa tamen concidunt; inertes elateres jacent; estque mechanica constructio ruinæ proxima.

II.

LQUIDÆ corporis partes conclusæ solidis jugi ac multiplici cientur motu. Plurimas illarum insensiles moleculas de sede dimovent; foras per varios pellunt exitus: & cum eis majori copiâ erumpunt, aufugiunt. Hinc naturalis utrarumque mutatio, prima futuri interitus causa. Cum liquida-

rum principia diuturno motu, & intestino² & externo, magis ac magis dis-
 ciantur; & rupto sulphure (communi omnium vinculo) spiritus salesque
 volatiles avolant: tunc superstites succi acorem contrahunt, & vini vetu-
 stioris instar in quamdam aceti speciem degeneres fiunt. In senectute igitur
 horum succorum acida nec amplius actuosius particulis à se invicem satis
 sejuncta ac dissita, nec ferè collisa, nec ferè refracta dominium teneant ne-
 cessum est. Hujus quoque rei argumento sint ructus acidi in senibus frequen-
 tiores; & uniuscujusque lingua acidum senescentis sanguinis saporem per-
 ciens. Effræctos desidentisque senum liquores, immò & exhausti spiritus non
 minus declascent pulsus seignities, trementia membra, frigidus madidusque
 nasus, oculorum livor, obscuritas, lacrymæ, obtusi sensus, delæta ferè
 memoria, sterilis imaginatio, etiamnum mentis torpor. (quod si omnia
 hæc tristia phænomena in quibusdam senibus non contingunt: veneranda
 universæ legis exceptio est, singulari supremi artificis beneficio condonata.)
 Fatalem verò vasorum remissionem & elaterum inertiam testentur non modò
 ex iis, quæ dicta sunt, multa; sed & pendentes genæ, corporis macies, cu-
 tis rugæ, ac motuum omnium tarditas. Machinam denique mox perituram
 demonstrent humorum in propriis tubulis mora, & extra non paucos ipso-
 rum alveos fluxus; quos tota compages multis in locis dehiscens annisque
 attrita & effracta continere ac regere haud ampliùs potest.

I I I.

TOT malis decessi senes vitam non spernunt! hujus occasum finem-
 que timent. solem, qui ipsis tam obscuros facit dies, ac brevi nullos
 faciet, ardentè cupiunt sistere; & alterum Josue sollicitè quærunt. oculatis
 occurrunt plurimi; qui non insolito equidem miraculo, sed humanâ industriâ,
 improbo labore efficiunt: ut astrorum splendidissimum illis clariùs diutiusque
 luceat, in terrâ quærunt celi auxilium; quo possit spiritale Microcosmi sidus
 in suo circulo jucundiùs immorari; & vitalem corporei externique luminis
 perceptionem servare, prorogare. In hanc rem plantas seligunt in terrâ su-
 perficie: in hujus visceribus mineralia metallaque scrutantur: nec non venan-
 tur animantium omne genus; ex iis omnibus diversas & salurares particulas
 variis artibus educturi. Nulla derique non lustrant regna, & trans mare cur-
 runt; ut senibus aliisque mortalibus, si non immortalitatis Pharmacum, sal-
 tem solatia quædam inveniant. Plagæ etenim sunt talibus præsidii alia aliis
 ditiores. Ex his præstant Indicorum, Sinarum, Japonicorumque regiones: in
 quas, veluti in alteram promissionis terram, novis istis Josue penetrare da-
 tum est. ibi optata vigent Naturæ munera, ibi Phæbi terræque sunt amabi-
 les fetus, vividioribus fecundi connubii flammis, purioribusque succis &
 formati & viventes, hos inter arbuscula Thé viret, suis celebrata foliis, quæ
 mole exilia; viribus magna; omnium deliciarum; multorum salus. Nihil enim
 melius potest effræctas & imbelles tam liquidas, quàm solidas senilis corporis
 partes rescicere, evecta frenare acida, etiamnum frangere; depauperatos spi-
 ritus ditare; firmare laxiora vasa; inertes pigrosque elateres stimulare; pro-
 ximam horum omnium tardare ruinam, voracisque Libithinæ prædam ad
 tempus retinere.

NOBILISSIMUS hic-ce frutex malo punicæ, Myrthoque magnitudine, & decore non impar, plurimos è caudice ramos ac furculos mittit innumeris floribus rosarum instar, totidemque foliis luculenter ornatos, de floribus, ut de radice pluribusque aliis partibus, quàm variæ quàm discrepantes sententia! folia, quæ sola ad nos advehuntur, & quæ frequens commendat usus, decet duntaxat, & possumus, expendere. His analysi Chymica evolutis, & subiectis æquo sanorum sensuum judicio tribuantur amica volatilium salium, blandissimique sulphuris consociatio gratissimi odoris parens, & subamarus stypticus que sapor, ab his omnibus illorum præcipua vis. quid vividi isti sales ad infringendos vel absorbendos acidorum aculeos valeant; extra nos commonstrant innumera artis Chymicæ experimenta; intra nos eorum operâ soluræ obstructions concretionisque variæ, acidorum modo causæ, modo effectus, subamararum Thé particularum munus idem, harum poros explora; & intelliges evecta senum acida illos subire vix posse absque suorum aculeorum aut ruptione, aut implicatione. Nec minùs mireris quàm jucundè illius sulphur hæc quoque aciduleniat; ruptumque principiorum sanguinis naturales fœdus instaure: expende balsamicos ac molles ejus ramulos; & id tibi certò constabit. Verùm plura potest adeò exquisitum sulphur. Motum addit effectis liquoribus; degeneres spiritus emendat; depauperatos reficit. Hi tamen salutares effectus non à solo simplicisque sulphure, sed à salibus volatilibus, & à subtiliori materiâ intra recensitos illius ramulos luxuriantibus etiam repetendi. Quanta est intimæ hujusce misturæ vis! hæc restitutis nativis rarefactionibus non modo fatalis liquidorum densitas minuitur plurimùm, aut ad tempus tollitur, sed & solidorum remissio æquè pertimescenda cessat; tonusque redit. Liquorum omnè genus in majorem molem expansum, quæ concidunt, vasa mirè roborat, sustinet. Immò vel minimæ fibræ, quibus alii formantur ductus, uberiori vividiorum particularum accessione veluti recreatæ facile saliant, oscillant; vitalesque motus renovant, protrahunt. Non minùs benè morantur fatiscentis citiusque perituræ machinæ ruinam pretiosa folia, styptics, quibus gaudent, particulis. Hæ dissociata jungunt; laxata firmant; clauduntque aditus domesticis, ut extraneis, hostibus; & veluti pali tremulam vetustamque domum à ventorum impetu, ab aquarum eruptione, variisque procellis tuentur.

V.

QUANTUM Thé senibus prodesse soleat: si quis è supradictis non capiat; det saltem manus experientiæ; hæcque discat, illius præsidio crudos senilis corporis humores apprimè subigi; molestos discuti status; turpes ructus domari; fuscitari, augeri ciborum appetentiam: eorum que concoctionem non parùm juvari; tardam scilicet promoveri; depravatam corrigi; & quavis ex parte imperfectam reddi multò meliorem. Dubitas assensum sustines, donec periculum feceris? interim expendas rursus & attentius, quid possint vividæ, stypticæ, & subamaræ particule in salutiferis Thé foliis vigentes, licet non supra modum evectæ. Omnibus imbecillis ac vitatis, sive liquidis sive solidis, partibus naturâ suâ junctisque viribus

non mediocriter opitulantur. Sed præsertim pigriorem suscitant ventricul-
 lum; firmant laxiorem; supervacanea noxiave acida perimunt, aut im-
 plicant; necessaria movent; pellunt que, ut expedit, in alimentorum po-
 ros illis proportione affines; in quibus ætherea materia impulsis hisce acidis
 compressa in particulâ ipsam continentes validius fertur; has quaquâ versus
 expandit; ex iisque alias dirumpit; alias evolvit, & extricat. Sic earum
 mole, figurâ, positurâ, quiete, ac motu prorsus immutatis nova intimaque
 mixtio, optandus Chylus (beneficus omnium liquorum fons) confici-
 tur. Quanta indè vetusti sanguinis, & aliorum liquorum; immò solidarum
 partium emendatio! quàm felix triturationum, secretionum, & omnium
 functionum instauratio, vitæ & sanioris & longioris spes! Adeò latè pa-
 tent exotici nostri fruticis dotes, ut eis mens ipsa, materiæ quamvis ex-
 pers, sed suo caduco domicilio ob institutam à creatore societatis legem
 gravata, mœsta, & veluti sepita, grato quasi incantamento nemini non noto
 frequenter sublevertur. tetri halitus ad ejus sedem solâ circuitûs viâ translati,
 etiamnum transferendi, mirum in modum subiguntur, disperguntur. faciles
 cineræ substantiæ aditus heterogeneis particulis clauduntur. defæcati sincerio-
 resque animales spiritus acceptos ab objectis typos modosve distinctiùs servant;
 distinctiùs quoque, in destinata cerebri parte (verisimiliter callosâ) consi-
 gnant: aut impressâ jam vestigia sine obicibus subeunt ac relegunt, congruentes
 ab eis modificationes excepturi. sensatio tunc, imaginatio, memoria, omnes-
 que animæ actiones multo vegetiores evadunt. Quid plura? hæc sufficiant iis
 qui non præjudicatâ opinione reerentur; & æquis omnia librant ponderibus.
 tot, aliaque commoda è variis Thé præparationibus, et maximè ex ejus tin-
 cturâ aquæ leviter bullientis auxilio extractâ haud dubiè expectanda senibus.
 sapienti & frequenri illius usu ipsis non ampliùs erunt spinæ sinè rosis, hyems
 sinè vere, tenebræ sinè luce; sed primarum ætatum flores, vigor, splendor-
 que in senectute apud nos, ut apud Sinas, non parùm reviviscunt.

Ergo senibus Thé.

Proponebat Parisiis JOANNES BAPTISTA SILVA
 Burdigalensis, Baccalaureus Medicus. A. R. S. H. 1712.

Apud Viduam Francisci Muguet, Regis & Facultatis Medicinæ Typog. 1712.